

外祖孙部汇考

尔雅

释亲

母之考为外王父母之妣为外王母母之王考为外
曾王父母之王妣为外曾王母

注

异姓故言外

又

女子子之子为外孙

外祖孙部总论

礼记

丧服小记

为母之君母母卒则不服

陈

注

母之君母者母之嫡母也非母所生之母故母

在而为之服则己亦从而服是徒从也徒从者所
从亡则己故母卒则不服

仪礼

丧服

为外祖父母传曰何以小功也以尊加也

疏

释曰发问者是传之不得决此以云外亲之服

不过缌麻今乃小功故发问云以尊加也者以言
祖者祖是尊名故加至小功言为者以其母之所
生情重故言为也

外孙

注

女子子之子

疏

释曰云外孙者以女出外适而

生故云外孙

宋郑氏家范

外孙生

女适人者若有外孙弥月之礼惟首生者与之余并不许但令人以食味慰问之

外祖孙部艺文一

和氏外孙道生哀文

晋孙楚

嗟尔道生和氏之宝玉颜丰下曜于怀抱暮春而育孟冬而夭二十三旬奇于五日方之期颐百分之一命之修短始则有终谁能长久与天无穷籛翁近千殇子幼冲俱反无形冥昧之中造化多少岂独尔躬

和氏外孙小同哀文

前人

晬晬舜华朝生夕落尔命方之犹为浅薄暂有冥质寻反冥漠譬彼蜉蝣不识晦朔死尚未知生亦焉知尔虽旬月我未之视万物混焉天地一指杪末婴孩安足称诔大人达观同之一揆

外大父祝公遗事

宋朱熹

外祖家新安祝氏世以赀力顺善闻于州乡其邸肆生业几有郡城之半因号半州祝家有讳景先者号二翁尤长者元佑黄太史尝赞其画像广幅全身大书百许字词甚瑰玮经乱而逸熹少时见外大父犹能诵其语至诸舅则皆已不复记忆矣二翁诸子皆读书外大父其第一子也讳确字永叔特淳厚孝谨少时闻父母将谋婚口避累日家人惊索得之犹涕泣不能已问其故则曰审尔则将不得与父母昆弟蚤夜相亲矣亲丧庐墓下手植名木以千数率诵佛书若干过乃植一本日有常课比终制而归则所植已郁然成阴矣一兄一弟先后死熙河皆亲往致其丧往反徒步不啻万里所舍辄悲号上食如礼夜寝柩旁不忍跬步离去路人皆为叹息诸弟求析其产公为涕泣晓譬不能夺时四妹犹未行而诸弟得财皆散去不复顾公独罄己赀以遣之其一归同郡汪公勃汪公后登二府终身德公不能忘人两贤之岁大疫亲旧有尽室病卧者人莫敢闯其门公每清旦辄携粥药造之遍饮食之而后反日以为常其他济人利物之事不胜计虽倾赀竭力无吝色乡人高其行学试又多占上列郡博士请录其学事时三舍法

行士子无不繇庠序以进公从容其间若无所为而后生得所矜式咸敬服焉熹先君子于时亦为诸生年甚少未为人所知公独器重以女归之后卒以文学致大名世乃以公为知人方腊之乱郡城为墟乡人有媚事权贵者挟墨敕徙州治北门外以便其私而所徙窟下潦涨辄平地数尺众皆不以为便将列其事以诉诸朝者余二千人而莫敢为之首公奋然以身任之其人忿疾复取特旨坐公以违御笔之口公为变姓名崎岖逃遁犹下诸路迹捕不置如是累年时事变更群小破散然后得免而州治亦还故处乡人至今赖之而公之家货事力不能从如往时矣然终不以为悔也比其晚岁生理益落而好施不少衰年八十三以终娶同郡俞氏亦有贤行生二男一女伯舅莘娶张氏其先以治狱有阴功王宣徽拱辰所传张佛子者也次即先夫人德行特似公其行事自见家传叔舅峤少敏悟有文长从先君子游闻伊洛之风而说之然求举辄不利俞夫人及伯舅既先卒叔舅后公十余年亦即世今惟伯舅之子康国居建之崇安叔舅之孙回居剑之尤溪而康国二子已总发能诵书矣熹惟外大父之淳德高行先人后己其诚心所格固宜有后而康国母家所积之远又如是天之报施其将在于此乎窃感陶公作孟府君传及近世眉山苏公亦记程公遗事不胜凯风寒泉之思因书此以遗康国使藏于家时出而训习之以厉其子孙又记尝闻先夫人说第四外叔祖豪侠不羁蚤从黄太史游黄公谪黔中因以客从黄公贤之为更名林宗而字之曰有道与之讽咏书札甚多今皆不存独所为书柳如京皇考志世或传其墨本姓字尚可见耳先夫人及叔舅少时犹及见其道说黄公言行甚详酒酣悲歌感慨凄切绝不类世俗音调问其所以则曰黄公之遗声也此事外家兄弟亦少闻者因附记于此云

熹既叙此事将书以遗济之弟未果而济之复以疾不起其二子丙癸相从于建阳因书畀之俯仰

今昔为之流涕不能已庆元戊午腊月既望书

外祖孙部艺文二

诗

谈氏外孙生三日喜是男偶吟成篇兼戏呈梦
得 唐白居易

玉芽珠颗小男儿罗荐兰汤浴罢时
春来盈女手梧桐老去长孙枝
庆传媒氏燕先贺喜报谈家
乌预知明日贫翁具鸡黍应须酬赛引雏诗

小岁日喜谈氏外孙女孩满月 前人

今旦夫妻喜他人岂得知自嗟生女晚敢讶见孙迟
物以稀为贵情因老更慈新年逢吉日满月乞名时
桂燎熏花果兰汤洗玉肌怀中有可抱何必是男儿

谈氏小外孙玉童 前人

外翁七十孙三岁笑指琴书欲遣传自念老夫今耄
矣因思稚子更茫然中郎余庆锤羊祜子幼能文似
马迁才与不才争料得东□空后且娇怜

七夕见与诸孙题乞巧文 权德舆

外孙争乞巧内子共题文隐映花□对参差绮席分
鹊桥临片月河鼓掩轻云羨此婴儿辈欢呼彻曙闻

石柱 郑谷

外祖在南官七转名曹鏊皆在

暴乱免遗折森罗贤达名末郎何所取叨继外门荣
宗忠简公画像为公外曾孙叶深道作

元柳贯

近古社稷臣生世常不数不能半五百继见已超卓
炎运昔中否兵氛缠大角掩□薄日黄张弧北风恶
起公阳节仗以障河朔恳恳存赵忠愤极涕横落
扶义亟西征敌愆为小却佐兴灵武功受任留官钥
主辱臣则何国势滋以削回銮累十疏言諄听殊藐
一死不贷公百壬吁可怍企公如列星宵光仰昭灼
几叶外曾孙传世春秋学手图起予观言自崇勋阁
士雅虽则休随会尚堪作蹙国今更非云飞天一握
谁能挽江汉为公洗河洛

外祖孙部纪事

汉书高祖薄姬传薄姬文帝母也父秦时与故魏王宗女魏媼通生薄姬而薄姬父死山阴因葬焉代王立为皇帝太后母亦前死葬栎阳北乃追尊太后父为灵文侯会稽郡致园邑三百家长丞以下使奉守寝庙上食祠如法栎阳亦置灵文夫人园令如灵文侯园仪太后蚤失父其奉太后外家魏氏有力乃召复魏氏赏赐各以亲疏受之薄氏侯者一人

景帝王皇后传皇后武帝母也父王仲母臧儿生男信与两女长女内太子宫太子爱幸之生一男男方在身时王夫人梦日入其怀景帝即位王夫人男为胶东王王夫人为皇后景帝崩武帝即位为皇太后尊太后母臧儿为平原君

赵婕传婕昭帝母也昭帝即位追尊外祖赵父为顺成侯诏右扶风致园邑二百家长丞奉守如法顺成侯有口君姁赐钱二百万奴婢第宅以充实焉诸昆弟各以亲疏受赏赐赵氏无在位者惟赵父追封

王夫人传王夫人宣帝母也宣帝即尊位地节三年求得外祖母王媼媼男无故无故弟武皆随使者诣阙时乘黄牛车故百姓谓之黄牛姬上皆召见赐无故武爵关内侯旬月间赏赐以巨万计顷之制诏御史赐外祖母号为博平君以博平蠡吾两县户万一千为汤沐邑封舅无故为平昌侯武为乐昌侯食邑各六千户

许皇后传皇后元帝母也父广汉昌邑人掖庭令张贺言曾孙体近下人乃关内侯可妻也广汉遂与曾孙一岁生元帝数月曾孙立为帝立许为皇后许后立三年而崩后五年立皇太子乃封太子外祖父广汉为平恩侯位特进后四年复封广汉两弟舜为博望侯延寿为乐成侯许氏侯者凡三人广汉薨谥曰戴侯无子绝葬南园旁置邑三百家长丞奉守如法宣帝以延寿为大司马车骑将军辅政元帝即位复封延寿中子嘉为平恩侯奉戴侯后亦为大司马车骑将军

杨敞传敞子忠忠弟恇字子幼恇母司马迁女也恇始读外祖太史公记颇为春秋以才能称

后汉书第五伦传注东观记曰时米石万钱人相食伦独收养孤兄子外孙分粮共食死生相守乡里以此贤之

锺皓传皓少以笃行称李膺尝叹曰锺君至德可师皓兄子瑾母膺之姑也瑾好学慕古有退让风与膺同年俱有声名膺祖太尉修常言瑾似我家性邦有道不废邦无道免于刑戮复以膺妹妻之

三国志贾诩传诩字文和为郎疾病去官西迁至汧道遇叛氐同行数十人皆为所执诩曰我段公外孙也汝别埋我我家必厚赎之时太尉段颍久为边将威震西土故诩假以惧氐氐果不敢害与盟而送之其余悉死诩实非段甥权以济事咸此类也

晋书魏舒传舒少孤为外家□氏所养□氏起宅相宅者云当出贵甥外祖母以魏氏甥小而慧意谓应之舒曰当为外氏成此宅相

祖约传苏峻举兵约命女婿淮南太守许柳以兵会峻逃妻柳之姊也固谏不从石勒攻之约众奔溃约奔石勒勒薄其为人乃诈约曰祖侯远来未得喜欢可集子弟一时俱会至日勒辞之以疾约知祸及大饮致醉既至于市抱其外孙而泣遂杀之并其亲属中外百余人悉灭之

荀勖传勖字公曾颍川颍阴人汉司空爽曾孙也父盼早亡勖依于舅氏岐嶷夙成年十余岁能属文从外祖魏太傅锺繇曰此儿当及其曾祖

陈騫传騫父矫魏司徒矫本广陵刘氏为外祖陈氏所养因而改焉

四裔列传林邑国汉末县功曹姓区有子曰连杀令自立为王子孙相承其后王无嗣外孙范熊代立

杜不愆传不愆庐江人也少就外祖郭璞学易卜屡有验

杜有道妻严氏传严氏字宪贞淑有识量女韡有淑德傅元求为继室许之元前妻子成年六岁尝随其

继母省宪谓咸曰汝千里驹也必当远至以其妹之女妻之咸后有名于海内

谢道韞传道韞遭孙恩之难举厝自若既闻夫及诸子已为贼所害方命婢肩舆抽刃出门乱兵稍至手杀数人乃被虏其外孙刘涛时数岁贼又欲害之道韞曰事在王门何关他族必其如此宁先见杀恩虽毒虐为之改容乃不害涛自尔嫠居会稽家中莫不严肃

荀崧传崧字景猷志操清纯弱冠太原王济甚相器重以方其外祖陈郡袁侃谓侃弟奥曰近见荀监子清虚明理当不及父德性纯粹是贤兄辈人也其为名流所赏如此

贾充传充妇广成君郭槐性妒忌充遂无裔嗣及薨槐辄以外孙韩谧奉充后郎中令傅咸中尉曹轸谏槐曰礼大宗无后以小宗支子后之无异姓为后之文无令先公怀后土良史书过岂不痛心槐不从咸等上书求改立嗣事寝不报槐遂表陈是充遗意帝乃诏曰太宰鲁公充崇德立勋勤劳佐命背世殒陨每用悼心又裔子早终世嗣未立古者列国无嗣取始封支庶以绍其统而近代更除其国至于周之公旦汉之萧何或豫建元子或封爵元妃盖尊显勋庸不同常例太宰素取外孙韩谧为世子黎民后吾退而断之外孙骨肉至近推恩计情合于人心其以谧为鲁公世孙以嗣其国自非功如太宰始封无后如太宰所取必以己自出不如太宰皆不得以为比秦秀传贾充薨秀议曰充舍宗族弗授而以异姓为后悖礼溺情以乱大伦昔鄆养外孙莒公子为后春秋书莒人灭鄆圣人岂不知外孙亲耶但以义推之则无父子耳又按诏书自非功如太宰始封后如太宰所取必己自出如太宰不得以为比然则以外孙为后自非元功显德不之得也天子之礼盖可然乎绝父祖之血食开朝廷之祸门谧法□乱纪度曰荒请谧荒公不从

宋书殷景仁传太祖所生章太后早亡上奉太后所

生苏氏甚谨六年苏氏卒车驾亲往临哭下诏曰朕夙罹偏罚情事兼常每思有以光隆懿戚少申罔极之怀而礼文遗逸取正无所监之前代用否又殊故惟疑累年在心未遂苏夫人奄至倾殂情理莫寄追思远恨与事而深日月有期将卜窆窆便欲粗依春秋以贵之义式遵二汉推恩之典但动藉史笔传之后昆称心而行或容未允可时共详论以求其中执笔永怀益增感塞景仁议曰至德之感灵启厥祥文母倪天实熙皇祚主上聿遵先典号极徽崇以贵之义礼尽于此苏夫人阶缘戚属情以事深寒泉之思实感圣怀明诏爰发询求厥中谨寻汉氏推恩加爵于时承秦之弊儒术蔑如自君作故罔或前典惧非盛明所宜轨蹈晋监二代朝政之所因君举必书哲王之所慎体至公者悬赏爵于无私奉天统者每屈情以申制所以作孚万国贻则后昆臣豫蒙博逮谨露庸短上从之

徐湛之传湛之父达之尚高祖长女会稽公主湛之幼孤为高祖所爱常与江夏王义恭寝食不离于侧永初三年诏曰永兴公主一门嫡长早罹辛苦外孙湛之特所钟爱且致节之引情实兼常可封枝江县侯食邑五百户

王景文传景文长子绚字长素年七岁读论语至周监于二代外祖何尚之戏之曰耶耶乎文哉绚即答曰草薶风必偃少以敏惠见知

萧惠开传惠开少有风气涉猎文史家虽贵戚而居服简素初为秘书郎著作并名家年少惠开意趣与人多不同比肩或三年不共语外祖光禄大夫沛郡刘成戒之曰汝恩戚家子当应将迎时俗缉外内之欢如汝自业将无小伤多异以取天下之疾患邪惠开曰人间宜相缉和甚如慈旨但不幸耿介耻见作凡人画龙未成故遂至于多忤耳

王弘之传弘之字方平少孤贫为外祖征士何准所抚育

南齐书王慈传慈年八岁外祖宋太宰江夏王义恭

迎之内斋施宝物恣听所取慈取素琴石研义恭善之

王免传免女婿殷睿字文子宋元嘉末祖元素坐染太初事诛睿遗腹亦当从戮外曾祖王僧朗启孝武救之得免

王思远传思远琅邪临沂人尚书令晏从弟也父罗云平西长史思远八岁父卒祖引之及外祖新安太守羊敬元并栖退高尚故思远少无仕心

梁书张緇传緇字元长车骑将军弘策子也年数岁外祖中山刘仲德异之尝曰此儿非常器为张氏宝也

王规传规子褒字子汉七岁能属文外祖司空袁昂爱之谓宾客曰此儿当成吾宅相

韩怀明传怀明上党人也与乡人郭俱师事南阳刘虬虬尝一日废讲独居涕泣怀明窃问其故虬家人答云是外祖亡日时虬母亦亡矣怀明闻之即日罢学还家就养虬叹曰韩生无虞丘之恨矣

傅昭传昭字茂远北地灵州人六岁而孤十一随外祖于朱雀航卖历日

陆倕传倕字佐公少勤学善属文为外祖张岱所异岱尝谓诸子曰此儿汝家之阳元也

任孝恭传孝恭幼孤事母以孝闻精勤力学家贫无书常崎岖从人假借每读一遍讽诵略无所遗外祖丘它与高祖有旧高祖闻其才学召入西省撰史

朱异传异字彦和年数岁外祖顾欢抚之谓异祖昭之曰此儿非常器当成卿门户

荀匠传匠居父忧并兄服历四年哭无时形体枯瘁郡县以状言高祖诏遣中书舍人为其除服擢为豫章王国左常侍匠虽即吉毁瘁逾甚外祖孙谦诫之曰主上以孝治天下汝行过古人故发明诏擢为此职非惟君父之命难拒故亦扬名后世所显岂独汝身哉匠于是乃拜竟以毁卒于家时年二十一

魏书齐郡王简传简字叔亮太和五年封位中都大官简母沮渠牧犍女也简性貌特类外祖

杜诠传诠字士衡京兆人晋征南将军预五世孙也侨居赵郡初密太后父豹丧在濮阳世祖欲命迎葬于邺谓司徒崔浩曰天下诸杜何处望高浩对京兆为美世祖曰朕今方改葬外祖意欲取京兆中长老一人以为宗正命营护凶事浩曰中书博士杜诠其家今在赵郡是杜预之后于今为诸杜之最即可取之诏召见诠器貌瑰雅世祖感悦谓浩曰此真吾所欲也以为宗正令与杜超子道生迎豹丧柩致葬邺南

隋书皇甫绩传绩字功明安定朝那人也绩三岁而孤为外祖韦孝宽所鞠养尝与外兄博奕孝宽以其惰业督以严训愍绩孤幼特舍之绩叹曰我无庭训养于外氏不能克躬厉己何以成立深自感激命左右自杖三十孝宽闻而对之流涕于是精心好学涉略经史

外戚传高祖外家吕氏其族盖微平齐之后求访不知所在至开皇初济南郡上言有男子吕永吉自称有姑字苦桃为杨忠妻勘验知是舅子始追赠外祖双周为上柱国太尉八州诸军事青州刺史封齐郡公谥曰敬外祖母姚氏为齐敬公夫人诏并改葬于齐州立庙置守冢十家以永吉袭爵

云定兴传定兴女为皇太子勇昭训及勇废除名配少府定兴先得昭训明珠络帐私赂于述自是数共交游后帝将事四夷大造兵器述荐之因口少府工匠并取其节度述欲为之求官谓定兴曰兄所制器仗并合上心而不得官者为长宁兄弟犹未死耳定兴曰此无用物何不劝上杀之述因奏曰房陵诸子年并长成今欲动兵征讨若将从驾则守掌为难若留一处又恐不可进退无用请早处分帝从之因杀长宁又遣以下七弟分配岭表仍遣间使于路尽杀之五年大阅军实帝称甲仗为佳述奏曰并云定兴之功也擢授少府丞

唐书薛稷传稷字嗣通贞观永徽间虞世南褚遂良以书颀家后莫能继稷外祖魏征家多藏虞褚书故

锐精临仿结体遒丽遂以书名天下

蒋义传义性锐敏七岁时外祖吴竞位史官义幼从外家学得其书博览强记逮冠该综群籍有史才

杨嗣复传嗣复字继之父于陵始见识于浙西观察使韩滉妻以其女归谓妻曰吾阅人多矣后贵且寿无若生者有子必位宰相既而生嗣复滉抚其顶曰名与位皆逾其父杨氏之庆也因字曰庆门

韦丹传丹字文明京兆万年人早孤从外祖颜真学擢明经调安远令

徐齐聃传齐聃字将道高宗时累进西台舍人长孙无忌以谗死家庙毁损齐聃言于帝曰齐献公陛下外祖虽后嗣有罪不宜毁及先庙今周忠孝公庙反崇饰逾制恐非所以示海内帝寤有诏复献公官以无忌孙延主其祀

柳仲郢传仲郢拜京兆尹中书舍人纆干诉甥刘诩殴其母诩为禁军校仲郢不待奏即捕取之死杖下

温造传造字简舆姿表瑰杰性嗜书天子爱其才问造家世及年对曰臣五世祖大雅外五世祖李绩臣犬马之齿三十有二帝奇之

宋史赵赞传赞字元辅本名美后改焉幽州蓟人祖德钧后唐卢龙节度封北平王父延寿尚明宗女兴平公主至枢密使忠武军节度赞幼聪慧明宗甚爱之与诸子外孙石氏并育于六宅暇日因遍阅诸孙数十人目赞曰是儿令器也赞七岁诵书二十七卷应神童举明宗诏曰都尉之子太尉之孙幼能诵书弱不好弄克彰庭训宜锡科名可特赐童子及第仍附长兴三年礼部春榜

宋绶传绶字公垂幼聪警额有奇骨为外祖杨徽之所器爱徽之无子家藏书悉与绶绶母亦知书每躬自训教以故博通经史百家文章为一时所尚徽之卒遗奏补太常寺太祝

孙长卿传长卿字次公以外祖朱巽任为秘书省校书郎天禧中巽守雍命随所取浮图像入见仁宗嘉

其年少敏占对诏迁官知楚州粮料院

黄畴若传畴若字伯庸隆兴丰城人一岁而孤外大母杜教之淳熙五年举进士

余天锡传天锡字纯父史弥远延为弟子师归试于乡绝江与越僧同舟舟抵西门天大雨僧言门左有全保长者可避雨如其言过之保长知为丞相馆客具鸡黍甚肃须臾有二子侍立全曰此吾外孙也日者尝言二儿后极贵问其姓长曰赵与莒次曰与芮天锡告于弥远命二子来保长大喜鬻田治衣冠心以为沂邸后可冀也集口党且诧其遇以行天锡引见弥远善相大奇之计事泄不便遽复使归保长大惭其乡人亦窃笑之逾年弥远忽谓天锡曰二子可复来乎保长谢不遣弥远密谕曰二子长最贵宜抚于父家遂载与归天锡母朱为沐浴教字礼度益闲习未几召入嗣沂王迄即帝位是为理宗

过庭录崔豫忠宣长外孙也为长安县尉为人自负厚于责物忠宣守洛崔以书求教忠宣答之其略曰我平生所学唯忠恕二字一生用不尽至立朝事君接待僚友未尝顷刻离此又云人虽至愚责人则明虽有聪明恕己则昏尔曹但以责人之心责己恕己之心恕人不患不到圣贤地位也

元史王鹗传鹗字百一授翰林学士承旨无子以婿周铎子之纲承其祀之纲官至翰林侍讲学士

虞集传集父汲娶杨氏国子祭酒文仲女咸淳间文仲守衡以汲从未有子为祷于南岳集之将生文仲晨起衣冠坐而假寐梦一道士至前牙兵启曰南岳真人来见既觉闻甥馆得男心颇异之

明外史林瀚传瀚子庭筠行谊尝上外祖冢或请游九鲤湖不应既而曰吾恶夫行之不专也

彭泽传泽字济物幼受业外祖段坚有志节举弘治三年进士

孙慎行传慎行字闻斯武进人幼习闻外祖唐顺之绪论即嗜学有立志

外祖孙部杂录

礼记檀弓齐谷王姬之丧鲁庄公为之大功或曰由鲁嫁故为之服姊妹之服或曰外祖母也故为之服注

谷读为告齐襄公夫人王姬卒在鲁庄之二年赴告于鲁其初由鲁而嫁故鲁君为之服出嫁姊妹大功之服礼也或人既不知此王姬乃庄公舅之妻而以为外祖母又不知外祖母服小功而以大功为外祖母之服其亦妄矣

颜氏家训凡亲属名称皆须粉墨不可滥也无风教者其父已孤呼外祖父母与祖父母同使人为其不喜闻也虽质于面皆当加外以别之父母之世叔父皆当加其次第以别之父母之世叔母皆当加其姓以别之父母之群从世叔父母及从祖父母皆当加其爵位若姓以别之河北士人皆呼外祖父母为家公家母江南田里间亦言之以家代外非吾所识野客丛谈司马迁遭腐刑后为中书令尊宠任职其故人任安予书责以古人推贤进士之义迁报书情词幽深委蛇逊避使人读之为之伤恻可以想象其当时亡聊之况盖抑郁之气随笔发露初非矫为故尔厥后其甥杨恽以口语坐废其友人孙会宗与书戒以大臣废退阖门皇惧之意恽报书委曲敷叙其怏怏不平之气宛然有外祖风致盖其平日读外祖太史公记故发于词旨不期而然虽人之笔力高下本于其材然师友渊源未有不因渐染而成之者梁江淹狱中一书情词凄惋亦放迁作惜笔力不及